

é la vyéy lé pa ansanm. Maloya la mank a mwin kan mwin té ti alor lékol mi ratrap a mwin : kasèr lé kui, mé an minm tan revandikatèr. Na in boug la koz ek mwin pou fé in lartik zournal. Apré mi lir «Danyèl Waro la grandi dann maloya ». Bin non ! Lintéré sé ke ma la pa grandi la dan ! li la tié tout sak ma la di, tout sak mi roprézant.

Mwin la pa anvì èt rasis.

Sak i kontant pa mwin sé kan mi di le mo «zorèy». Lé pa fasil ansèrv a li akoz la sitiasyon. Na dé boug i di an piblik «ki sa i vol travay ? Ki sa i vol lozman ? ». Mi giny pa fé sa. Mi giny pa siport sa. Mwin la pa anvì dèt rasis mwin. Mon tanpéraman i pous a mwin nètway mon kozman firamézir, nètway mon pansé minm par rapor tousa. Mon langazman sé mon band zidé, pou lé zom, lanvironman, mé pa pou la rantabilité. Mwin lé kont la rantabilité a tou pri. Le péi, lanvironman, mon lang kréol sé sa i kont, mi travay pou sa.

Mwin lé pa pou RMI. Va déplèr in pé sa. Mé mwin lé pou domoun i travay. Minm esplwaté... mi préfèr in moun i travay. Minm si kan li bèk in klé, lot i anprofit si li... mé, kan li nana 40F dan son pos, lo samdi swar, li lé fièr, li péy in kou pou ou èk son larzan. Kan li la giny in pé dann kann li lé an pozisyon pou sobat ek son patron. Li giny roganiz a li èk dot koupèr kann. Alor lé sir si li giny RMI li sera pa esplwaté.

Si sé lot lotèr out malèr. donk sé li lotèr out bonèr ?

Mwin mi vé domoun lé aktèr, réponsab... parsék nou di fransé lotèr, zorey lotèr, gouvèrnman fransé lotèr ; linpérialism, le kolonialism, listwar : byin sir nou giny analiz kom sa ! Nou giny ésplik tou sa la si lo plan sosyolojik, istorik... Mé toultan nou sa kasyèt déryèr sa ? Toultan

gouvèrnman fransé lotèr ? zorèy la, patron la i esplwat a ou ? Si sé li lotèr out malèr, donk sé li lotèr out bonèr ? Ou vé sé out patron i désid ? Ali agrandi out kaz ? A li libèr a ou ? Ali donn a ou out bonèr ? Mi pé pa tonm dakor èk sa. I fo mèt si la tab limigrasyon, linvazyon... zorey i vyin, péyé, sirpéyé pou amont son lang, tousa i fo diskité. Mé mi sa pa di toultan lot lotèr, é mwin lé pa lotèr de ryin. Sa i komans dan mon maloya ; mwin lé toultan an vedèt, an lèr mé i kontant pa mwin èt tré koni kom sa, li bril... Zordi mi giny mon soso avek sak mi fé, é lé gayar ; lutil, lagréab, tout lé ansanm ; mé mwin na pwin in plan d'karièr é mi vé pa d'rannman la dan, sinon mwin noré rant dan in trin «tee-shirt, produits dérivés ». I ral pa mwin sa. Mwin lé kontan, mi di domoun «a zot i fé viv à mwin » ; mwin lé pa komersyal é an minm tan mwin lé plis komersyal dan le sans ke dot i atann ryink subvansyon. Mon démars sé dir « mi vé pa subvansyon pou èt lib ». Mi sava, mi sarpa, démèrd ! Mé mi ve pa subvansyon pou vwayazé, mi ve pa in konsèy zénéral, rézional, in méri la pous Danyèl, la kol in létikèt su son ki pou anway a li Pari. Astèr, mwin lé dakor larzan piblik i vyin èd bann group vwayazé, mé kan mi giny évit lo subvansyon, mi évit. Mi di bann marmay, lantrènman lé pa péyan ; mi zwé souvan san fé péyé, mi fors pa pèrone pou nir. Mi di a zot « sak nou fé gratuitman, sa lé payan ». Ou pèrd inn ou giny dis, tout fason ou giny. Minm kan mwin lavé larzan pli sir, lété kom sa. Domin le drwa dotèr, le SACEM i disparé, démerd a li ! Ma ésèy rod mon soso, mwin nora pi d'fantézi. Mwin la grandi dan la rigèr, dann plantasyon, mwin la plant mon manzé depi étan ti.

Nou manz do ri. mé nou plant pa do ri.

Soman, la lé lwin par rapor domoun ki koné pa koman in pié d'ri i lé. Nou manz do ri, mé nou